

6453

12

5

錢氏考古錄目錄

卷五

仙芝 延年 子文 括 師回 子穆 得臣

正叔 和 規 恬 深 而 貽範

德範 大雅 象先 大順 曠 伯通 拓

几 訪 揆 志通 缺名 宗哲 忠道

藻 昌武 筠甫 睦甫 仲珣 申 舉

禹卿 公輔 唐卿 師孟 弋 昉 羔羊

褒 長卿 温舒 煇 衡水知縣 叔獻

公纘 昌符 豐 曜 顛 道人 乙

如璧 承志 景衍 諷 汶 昌宗 師益



錢氏考古錄卷五

海甯錢保璿編

錢仙芝

唐彥猷硯錄江南故老云李後主所用龍尾石為

天下冠景祐中錢仙芝守歙得李氏取石處去谿水深不

可入改谿別道方可得人病其須索復谿如初石中絕仍

改谿流遵故道所得盡佳石 校理錢仙芝二硯一中有

全月下有雲翼之一有金斗星二雲左右之色頗青

宋綬吳越錢氏傳芳集序錢氏傳芳集者今樞密尚書彭

城公纂其宗門歌詩之作也武肅王之聲詩文穆王之錦

樓忠懿王之政本二集錄焉凡得格律長言共四十五首

族子仙芝又纂為五卷目曰後集

澠水燕談錄九南唐李氏之亡龍尾石不復出嘉祐中校

理錢仙芝知歙州訪得其所乃大谿也李氏嘗患谿不可入斷其流使由他道李氏亡居民苦其谿之回遠導之如昔石乃絕仙芝移谿還故道石乃復出

羅願新安志引歙硯說景祐中校理錢仙芝守歙始得李氏取石故處其地本大谿也常患水深工不可入仙芝改其流使由別道行自是方得之後縣人病其須索復谿流如初石乃中絕邑官復改谿流遵錢公故道而後所得盡佳石遂與端石並行

輿地紀勝英德府曾易占以太常博士知信州玉山縣州

守錢芝誣以罪貶英州

疑芝上有仙字

景定建康志五十南唐後主留心筆札所用澄心堂紙李

廷珪墨龍尾石硯三物爲天下之冠自李氏亡龍尾石不復出景祐中校理錢僊芝知歙州訪得其所乃大谿也李氏嘗患谿深不可入斷其流使使由宅道李氏亡居民苦谿之回遠導之如初而石乃絕僊芝移谿還故道石乃復出遂與端谿並行

慶歷元年十二月十日鄭戩等南屏山題名有尙書祠部郎中集賢校理彭城錢仙芝綺翁

李衛西湖志慶歷元年辛巳十二月南屏蔡襄等題名有

彭城錢仙游綺翁

當卽仙芝

宋史刑法志三官吏犯自盜罪至極死率多貸死然甚者猶決刺配錢仙芝帶館職李希甫厯轉運使不免也

康熙謝旻江西通志秩官門知信州錢仙芝

金石文跋尾天聖八年八月朱巽等題名有同判杭州錢

仙芝

按在楊州

同治湖州志錢先芝校書集賢院調烏程桐廬二縣尉遷

甯德令

疑仙芝之誤

錢延年

歐陽修論舉館閣之職劄子近年貴家子弟濫在

館閣者多如呂公綽錢延年之類尤為荒濫

再論按察

官吏狀貪贓如魏兼老病如陳果穢惡如錢延年庸常齷

齷如袁抗張可久之輩盡為轉運使皆自是可黜之人

慶曆

中

東坡跋翰林錢公詩後軾齟齬入鄉校即誦公詩今得觀

其遺跡幸矣元豐八年正月三十日又書王太尉送行詩  
後諸人有錢延年

宋元憲集二十六太常博士集賢校理錢延年可尚書祠  
部員外郎制

陳鵠耆舊續聞十翰林王公洙修撰錢公延年俱以丁酉

八月丑時生王十九日錢二十日錢以嘉祐二年

稗海刻  
青箱雜

記作六年六月卒時王公已病或謂王公起於寒素早歲蹇剝

庶可以免災侍郎掌公曰錢雖少年榮進晚節滯留王雖  
早歲奇蹇晚節遷擢長短比折禍福適均王公竟不起

羅從彥尊堯錄尹洙初入館編校四年欲得一差遣遂到  
中書援錢延年例曾徐曰學士自行何爲在錢延年等列



耶洙終身以爲愧恨其畏之如此

桑世昌蘭亭攷陸柬之特工臨寫今校理錢延年有柬之書蘭亭用綠麻紙

麟臺故事大率秘閣校理遷直秘閣集賢校理遷直集賢院或遷直龍圖閣至和中如張子思趙良規錢延年是也宋史錢若水傳若水卒子延年甫七歲錄爲太常奉禮郎延年後以獻文賜進士出身歷太常博士集賢校理賈黯傳直龍圖閣錢延年擢天章閣待制黯當命辭卽詆延年不才不宜污侍從封詞自還中書命遂寢

錢子文 胡宿文恭集三送錢子文著作宰福陽七律

錢括 胡文恭集十五錢括可都官員外郎制

紹熙雲間志知縣題名有錢括景祐三年

錢師回 胡文恭集十七錢師回可供備庫副使制有邈居  
江鬱之潯近按島夷之悍語

錢子穆 胡文恭集二十錢子穆可左監衛將軍致仕制

錢得臣 李觀盱江集十三南城縣署記慶歷二年會稽錢  
得臣仲基以大理丞爲南城宰西安周夢臣旻臨川滕平  
叔夷甫佐之於是改作主簿尉署及縣廳之兩翼旣訖功  
得臣受命刺白州有送錢寺丞知白州詩

嘉定赤城志十通判表皇祐二年錢仲基以國子博士至  
時郡大水請發倉廩且丐粟當路以濟民飢陳密學襄有  
詩美之

錢正叔 中吳紀聞一姑蘇自祥符間定制秋舉以四人爲  
額慶厯中就舉者止二百人范貫之龍圖嘗作送錢正叔  
赴舉序已言四人之額視他藩爲最寡

錢和 鄭克折獄龜鑑云包拯知揚州錢和知秀州有仇盜  
割牛舌者皆使歸屠牛散肉遂爲仇所告以此獲仇盜

錢規 四川通志進士類皇祐元年進士錢規資州人

錢恬 四川通志進士類皇祐五年進士錢恬資州人

錢深 吳郡志二十八進士題名皇祐五年錢深

錢而 宋史西南諸夷傳初監戶晏州夷人錢而毆傷斗落

妹其眾憤怒欲報之知瀘州張昭信勸諭旣已慰服

按文疑有

誤未必人姓名也

錢貽範

章峴重開顧會浦記禾興郡領邑四號繁劇者華亭居其首唐天寶中析吳郡東境而置焉負海控江土爲上腴其魚鹽之饒版圖之盛視他邑之不若也國朝重馭民之官宰是者非名通閩籍秩在京寺則未始輕授慶曆辛巳歲夏六月彭城錢君以九棘丞來更縣章君再調百里

凡積政間有因仍未遑者思諗窮之顛乎改爲如恐不及直縣西北走六十里趨青龍鎮浦曰顧會南通漕渠下達松江舟艤去來實爲衝要平疇芳甸傍羅迤邐灌溉之厚民斯賴焉自斡山之陽地形中阜積淤不決漸與岸等每信潮吐納才及半道而止者垂三十年康定建元之後愆澤仍歲浦無流津榜人其咨捨舟而徒錢

君惻然有濬浦便民之志首建 明年春由青龍睨江

瀾所來圖上其狀遂以議白府會府公集仙錢侯偃藩之  
初銳於振舉周覽風俗憫時菑凶期於順成刻意溝瀆樂  
聞斯議深然其請乃籍新江海隅北亭集賢四鄉之民得  
役夫三千五百五十人府教以尉孫君專董其役旣授成  
算乃克濟美庇徒之始患穀高民饑又重費官廩募邑之  
大姓洎瀨浦豪居力能捐金錢助庸者意其豐約疏之於  
牘誘言孔甘喜輸叢來凡得錢一百三十六萬計粟之直  
頭會而晨敷之繇是揆日戒告標明部分定幟臚呼荷鍤  
雲集澤門廢不勉之扶東山賦忘勞之詩興三月辛酉訖  
四月己丑始於邑郭終於江濼增深四尺概廣八丈無慮

役工十萬二千九百五十畚土平道者不預焉距縣半里  
舊設堰堤壅其上流今則仍貫按圖經縣管塘浦大而居  
其最者五顧會是其一焉次日盤龍曰嵩塘曰趙屯曰大  
盈而嵩塘首源與顧會合俱支流股引環漬民壤錢君又  
諭墾田者乘農之隙戶出丁壯咸至顧會疏導之其或歲  
苦淫雨水沴且作則敗去防庸縱其澶漫自浦而泄滙於  
大川若驕陽盛怒蘊隆爲虐則瀦渟潮波分注疆畝由浦  
而入潤漑千頃夫然則陰陽慘舒之權歲時豐穰之候可  
移於人手何水旱之足慮哉爾其大堤屹起素波盛滿烟  
霞澄滅乎萬狀齎淪朝夕而雨至行商力穡者各適其便  
拏音壤歌而歡騰其間於是邑氓之耄老鼓舞聚而言曰

茲浦之堙為吾儕病久矣曩時字人者雖廉得利害而嗇於經費豈物有通否必待其人耶今吾宰以和惠浸人髓以鍼石去民瘼興壞起廢易於轉圜是舉也靡殘乎私罔耗於公因民所欲而利之則圖大垂久之物孰愈於是哉噫穀蒲之爵風化所繫昔人之以最課異績美在信史者不可勝紀今之為縣者雖有通人之才囍於施用而易於韜晦率不過循蹈常轍飭身養望為榮名之漸坐守歲華幸而代去其於建利除害幾何哉觀是浦也則錢君政治之淑慝從可知矣傷工之辰命案寮浮舟以落之峴當載筆宜識其事聊謹歲月以俟來者云慶歷二年歲在壬午四月二十九日記

紹熙雲間志下 案中卷知縣題名 有康定二年錢貽範即文中錢君也

皇祐二年正月重修北嶽廟記朝奉郎太常博士通判定  
州軍州兼制置營田及管內勸農事上騎都尉借緋錢貽

範篆額

錢大昕金  
石文跋尾

錢德範

李衛西湖志錢德範等題名在青林洞臨安錢德  
範莆陽僧貽孫同游皇祐二年六月一日正書摩崖

錢大雅

嘉定赤城志十一縣令表甯海縣令至和元年錢

大雅二年替

錢象先

歐陽文忠內制集七嘉祐四年十二月賜刑部郎

中充天章閣待制錢象先等獎諭詔勅象先省所進禘享

詩事具禘大祭也禮久闕焉朕因時孟冬躬薦圭鬯永惟

祖考之烈格于天地禮樂之盛昭乎物容宜有儒學之臣



錢氏考古錄卷五  
形爲頌歎之美覽奏篇之來上慶熙事之有成文采可觀  
歎嘉於再故茲獎諭想宜知悉

胡文恭集三十八張友直誌嘗與侍講學士錢象先奏事  
便殿已而上目送公謂象先曰張友直占對容止如其父  
其見賞待如此

王荆公詩注二十三溫公朔記云嘉祐五年九月錢象先  
闕詢陳經王安石使契丹

吳郡志二十五人物錢象先字資元郡人中進士高第宰  
相呂夷簡薦其經行爲國子監直講歷大理少卿三司判  
官河北江東轉運使天章閣待制龍圖閣學士官尚書刑  
部侍郎又歷知河中河南府許潁陳蔡亳州以吏部侍郎

致仕象先長於經術仁宗留神經藝象先以古學進勉問  
有顧問依經以對因以諷論政事時務有啓迪獻納之益  
留付經筵前後十五年又通刑名之學所尙詳平又以犯  
勅者重犯令者輕請移勅文入于令者甚衆又省去許捕  
之條百餘其持法近厚如此修勅成例賜勳爵獨賜三品  
服仁宗謂輔臣曰象先以孝聞有母八十歲以此慰其母  
心熙甯九年卒年八十一 二十八進士題名天禧三年

錢象先

吏部  
侍郎

事文類聚遺集五宋朝錢象先知律令屢爲刑法官預修  
慶歷嘉祐編勅及州縣諸路條貫常以犯勅者重犯令者  
輕請移勅文入令者甚衆又嘗議告捕法以爲罪有可告

捕者皆許捕則姦民得依法以害善良因省去許捕之條百餘其持法近厚如此勅成例進勳爵仁宗以其母老有以慰之乃獨賜公三品服

宋史傳錢象先字資元蘇州人進士高第呂夷簡薦爲國子監直講歷權大理少卿度支判官河北江東轉運使召兼天章閣侍講詳定一路敕成當進勳爵仁宗以象先母老欲慰之獨賜紫章服進待制知審刑院加龍圖閣直學士出知蔡州象先長於經行侍邇英十餘年有所顧問必依經以對反復諷諭遂及當世之務帝禮遇甚渥故事講讀官分日送進象先已得蔡帝猶諭之曰大夫行有日矣宜講徹一編於是同列罷進者浹日徙知河南府陳州復

兼侍講知審刑院象先旁通法家說故屢爲刑官條令多所裁定嘗以爲犯勅者重犯令者輕請移勅文入令者甚衆又議告捕法以爲罪有可去有可捕苟皆許捕則姦人將倚法以害善良因削去許捕百餘事其持心平恕類此復知許頴陳三州以吏部侍郎致仕卒年八十一

王珪華陽集十三賜龍圖閣直學士知審刑院錢象先斷絕獎諭詔二

涑水紀聞五引錢資元語

魏了翁跋諸賢帖有錢明逸錢象先帖

續通鑑長編嘉祐五年八月刑部郎中天章閣待制兼侍讀錢象先賀國母生辰

錢大順 咸淳臨安志進士表嘉祐二年錢大順

錢崱 寶慶會稽續志進士題名嘉祐六年王俊民榜錢崱

錢伯通 嘉泰會稽志十八井儀堂錢伯通撰記云堂在蓬

萊閣之上望海亭之下西樓其左西園其右成於嘉祐六

年

錢拓 周濂谿集有行縣至雩都邀餘杭錢建侯拓四明沈

幾聖希顏同游羅巖詩嘉祐八年正月七日期 又愛蓮

說嘉祐八年五月十五日江東錢拓上石

錢几 顧應祥長興縣志錢几字君憑號圍翁長興人游心

儒術學有源委爲一鄉士大夫冠冕徵辟不起有圍翁集

三卷 進士題名記鄉先生錢几君憑年八十云云政和

五年劉燾文

錢訪 宋元憲集六送常熟錢尉詩五律一 二十三前明  
州錄事參軍錢訪可大理寺丞判

宋景文集二十一送常熟尉錢訪五言長律一

錢揆 宋元憲集二十四前光祿寺丞錢揆服闋可舊官制

錢志通 王洙王氏談錄焦秀才云錢志通於編輯刑說皆

一一節目之說郭二  
十四

錢 紹熙雲間志進士題名嘉祐八年戴顯甫一姓錢

錢宗哲 強至送監征錢宗哲序人心之仁均有也然而不  
能者利奪之爾關征之吏掠囊發篋索人之隱其心豈素  
不仁哉蓋曰賞格誘之爾今有司之令主關征者月校季

比歲終會其課視前歲之增減以爲殿最課增有厚賞惟恐搜隱之不至仁何預我哉浦陽在婺爲窮山商旅之過婺者多道旁邑故關征之官常病歲課益張其防伺人之來問有一觸者則必傾囊倒篋算緡而去譬夫設機待獸中則不釋故商旅益不來常歲之課益不登獨錢君宗哲之莅是局其術大抵本仁誼且曰籠商之術在寬不在急急則吏與商爲表裏將寡取其賄而私縱之寬則商喜輸官而吏無以爲私計宗哲持是術凡商旅之過者必裁減其數而征之繇是皆願出其塗而常歲之課愈登四方之商率稱宗哲爲材官又浦陽俗善織凡補吏者指此邑爲膏潤其空橐而來盈裝而歸者前後或相繼獨宗哲解官

去家儲無擔石吏負而隨者皆先世賜書與父祖誥軸一  
邑之民愈以宗哲爲廉吏宗哲嘗語予我高祖挈東南之  
籍歸天子始有功王室厥後用直言登科選者一門凡三  
人故家聲大于當世今我階蔭籍列冗官苟使規規歲課  
覲賞格之及甯獨愧吾門抑豈不貽仁誼之羞耶故學不  
喜章句仕不圖苟進惴惴焉唯弗紹家世之烈爲懼以是  
宗哲能文善詩卓然有遠器噫能言宗哲之材而不能知  
其廉者四方之商也能知其廉而不能知其文者一邑之  
民也知材與廉而復能知其有文且仁者予也于其行并  
取行商居民之誦以爲序云至和乙未三月十一日浦江

令強某幾聖題

祠部集  
三十三



錢忠道

吳郡志四十六載治平中錢忠道過吳中贈漁女

詩二句末注清隱集

漁隱叢話前集六十青瑣集云治平中錢忠道過吳江愛其風物清佳留戀不能去終日諷詠遊賞遇一女子小舟獨棹於烟波浩渺間忠悅之作詩贈女子其警句云滿目生涯千頃浪全家衣食一輪竿女子得詩携歸呈其父其父蓋隱淪客也喜忠此詩遂以女子奉忠箕帚泛舟同入烟波不知所往

輿地紀勝五同

錢藻

元豐類稿故翰林侍讀學士錢公墓誌銘公錢氏也

故爲王家有吳越之地五世祖鏐號武肅王高祖元璽文穆王曾祖儼昭化軍節度使祖昭慈贈左衛將軍考順之

左侍禁閣門祗候贈尙書刑部侍郎公應說書進士賢良  
方正能直言極諫皆中其科歷宣州旌德縣尉大理寺丞  
殿中丞太常博士尙書祠部度支司封員外郎工部郎中  
授朝奉大夫充國子監直講編校集賢院書籍遷秘閣校  
理選爲修英宗實錄院檢討官直舍人院同修起居注遂  
知制誥直學士院遷樞密直學士翰林侍讀學士嘗通判  
秀州知婺州入判尙書考功改開封府判官出知鄧州入  
判尙書吏部流內銓兼判集賢院又兼判禮部權知開封  
府數請去得知審官東院兼判軍器監兼提舉司天監公  
事公幼孤家貧母嫁旣長還依其族之大人刻勵就學并  
日夜忘寢食於書無所不治已通其大旨至於分章別句

類數辨名叢細委曲無不究盡其見於文辭闕放雋偉故出而與天下之士挾其所有較於有司常出眾上以其故名動一時其爲尉及爲秀婺鄧州皆有治行秀州擊奸仆強果於力行婺鄧更革弛壞理具設張爲直講以能教誘學者歸之爲校理屬英宗之初慈聖光獻皇后聽政公三上書請還政天子爲吏部謹繩墨選者稱其平爲開封以慈恕簡重爲體不求知名以投世取顯爲公屬者有不與公合然公過之未嘗有厚薄意士以此多公而爲屬者後卒亦心服也公於眾不矯矯爲異亦不翕翕爲同以其故人莫能親疏至於利勢之際人所競逐公方隕然跡與眾遠故雖有夸者亦不以公爲可忌也公之爲判官也府嘗

有獄或稱大臣意謂欲有所附致公不爲動徐論其意而已公平居樂易無崖岸及至有所特立人固有所不能及者類如此也公爲人謹畏清約與人交淡然而後知其篤也公之先旣籍疆土歸天子其後至昭化守和州十有八年以卒詔葬和州子孫因家焉至公始葬其母於蘇州吳縣龍岡村之天平山故今又爲蘇州人公諱藻字純老封仁和縣開國伯賜服金紫年六十有一元豐五年正月庚寅卒於位某年某月某甲子葬天平山從其母永嘉郡太君丁氏之兆公妻孫氏泰興縣君男曰某曰某蚤世曰隲某官孫曰某某官公卒上馳使臨視其家知其貧特賜錢五十萬而官其弟若子孫凡三人公與余嘗爲僚相善

其且歿以遺事屬余而其家因來乞銘銘曰錢姓武王五世之孫開迹東南以學以文學則知經文則能賦矧曰方聞揚聲天路廼校中書廼掌帝制廼列禁林從容諷議治已伊何維直而清治人伊何維簡而平人以怒遷公能自克人以利回公能不惑士夫所望天子所器胡不百年胡不三事龍岡之宅考卜維新公安於此尙利後人代翰林侍讀學士錢藻遺表犬馬之質難駐於頽齡日月之光尙攀於愛景臣藻誠悲誠哽頓首頓首伏念臣出於悴族進以謏材文章講說制策之科衆稱華選儒館掖垣經帷之職世謂清塗獨徧竊於美名蓋親逢於亨運至於總銓衡之要劇領京邑之浩煩稜有勞能可論報稱肩寵靈而

過厚致災疾以交攻迫霜露之所侵且將漸盡幸髮膚之  
無毀得以全歸方去闕廷長投泉壤輒陳微志猶及能言  
伏願皇帝陛下御六氣之和慎調興止享萬年之祚永庇  
華夷再念臣偷殘息之僅存覬餘恩之可丐敢祈仁睿終  
賜矜憐臣有男進士皞孫男某親堂弟茂共出寒鄉稍親  
薄技葑菲不棄儻微祿之獲霑魚菽可供庶游魂之未餒  
伏望聖慈並於文資內安排安茲干澤愧在忘廉保存沒  
之孤踪託始終之大賜生而無益曾莫及於啣環死或有  
知猶庶幾於結草仰望旒扆臣不任云云 朝中祭錢純  
老文嗚呼公平窮經及史旁兼百氏廢寢與食不虛寸晷  
篤好無倦華顛愈勵疆記多識箱書屋僻闕議崇論河垂

海委詩賦講說三科射策金馬玉堂經帷三職寒苦自至  
無馮與翼銓綜再試士曰予歸尹正三歲衆曰予依公於  
所聞維學之力公於所知則維自得利害之際人鮮能安  
彼爲惴惴公獨桓桓愛惡之情人鮮自克彼有贅虧公爲  
衡石世所並逐公有不求彼囂我靜則莫我尤曾不三事  
位云未究曾不百年數云非壽殲國之良在列嗟咨隕民  
之望耆艾歔歔天子聞喪馳使臨視勞恤煢孤賙憐乏匱  
凡我同朝矧曰同志哀由感觸就知矢涕寓馬在庭薦羞  
在几公平來哉寄誠茲誅 館閣送錢純老知婺州詩序  
熙甯三年三月尙書司封員外郎秘閣校理錢君純老出  
爲婺州三館秘閣同舍之士相與飲餞於城東佛舍之觀

音院會者凡二十人純老亦重僚友之好而欲慰處者之  
思也乃爲詩二十言以示坐者於是在席人各取其一言  
爲韻賦詩以送之純老至州將刻之石而以書來曰爲我  
序之蓋朝廷常引天下儒學之士聚之館閣所以長養其  
材而待上之用有出使於外者則其僚必相告語擇都城  
之中廣宇豐堂游觀之勝約日皆會飲酒賦詩以敘去處  
之情而致綢繆之意歷世浸久以爲故常其從容道義之  
樂蓋他司所無而其賦詩之所稱引汎論莫不道去者之  
義祝其歸仕於王朝而欲其無久於外所以見士君子之  
風流習尚篤於相先非世俗之所能及又將待上之考信  
於此而以其彙進非空文而已也純老以明經進士制策



入等歷教國子生入館閣爲編校書籍校理檢討其文章  
學問有過人者宜在天子左右與訪問任獻納而願請一  
州欲自試於川窮山阻僻絕之地其志節之高又非凡才  
所及此賦詩者所以推其賢惜其志殷勤反覆而不能已  
予故爲之序其大旨以發明士大夫之公論而與同舍祝  
之使知純老之非久於外也十月日序

治平本揚子法言後列銜有無爲軍判官將仕郎試秘書  
省校書郎充國子監直講編校集賢院書籍臣錢藻

曾子固南齊書序後列校書人姓名有藻

蘇詩同年王仲甫挽詞先帝親收十五人自注仁宗朝賢  
良十五人今惟富鄭公張宣徽錢純老及余與舍弟在耳

送錢藻出守婺州得英字五言古詩施注錢藻字醕老  
武肅王鏐五世孫熙甯三年以尙書司封郎秘閣校理出  
守婺州同舍之士飲餞於觀音院會者凡二十人醕老爲  
詩二十言以示坐者各取其一言爲韻賦詩送之曾鞏爲  
之序 又送孫著作赴考城兼寄錢醕老李邦直二君詩  
歐集有熙甯七年朝奉郎守尙書工部郎中充秘閣校理  
直舍人院兼同修起居注權判流內銓騎都尉賜緋魚袋  
錢藻撰謚議

溫公日錄曾子固罷檢討以錢醕老代之

宋名臣言行  
後錄九引

新唐書校對有無爲軍判官將仕郎試秘書省校書郎充  
國子監直講臣錢藻嘉祐五年六月二十六日准中書劄

子奉聖旨下杭州鏤板頒行

孫公談圃滕達道錢醅老孫莘老孫巨源治平初同在館中花時人各歷數京師花最盛處滕曰不足道約旬休日率同舍遊三人者如其言達道前行出封邱門入一小巷中行數步至一門陋甚又數步至大門特壯麗造廳下馬主人戴道帽衣紫半臂徐步而出達道素識之因曰今日風埃主人曰此中不覺諸公宜往小廳至則雜花盛開雕闌畫楯樓觀甚麗水陸畢陳皆京師所未嘗見主人云此未足佳頤指開後堂坐上已聞樂聲矣時在諒閣中莘老辭之衆遂去莘老嘗謂人平生看花只此一處

澠水燕談錄七眞宗朝錢希白賢良方正擢第慶曆中子

明逸子飛彥遠子高相繼制舉登科子高謝啓云兩朝之間相繼者父子十年之內並進者兄弟希白從孫藻皇祐五年登進士第是年說書中選後十年復登制科其謝啓曰十年二第屢玷於主司一門四人無慙於祖烈

中吳紀聞胡翼之海陵人學者尊其道稱爲安定先生如滕章敏范忠宣錢內翰醕老皆從先生之學者也

東都事略錢藻字醕老吳越王鏐五世孫也舉進士又中制科爲人清謹寡過居守繩墨爲治簡靜立朝無矯亢之節亦不爲雷同處勢利淡如也人稱其長者英宗時爲秘書校理上書請太后還政通判秀州神宗時稍遷直舍人院同修起居注擢知制誥直學士院除樞密直學士知開

封府遷翰林侍讀學士卒年六十一

晁補之李清臣行狀爲翰林學士時錢藻充慈聖光獻皇

后山陵頓遞使

雞肋集  
六十二

錢唐先賢傳贊宋太中大夫錢公字醅老諱藻武肅五世  
孫幼刻厲爲學慈聖后臨朝公三上書乞還政歷同知起  
居注知制誥樞密直學士知開封府平居樂易無崖岸而  
居官獨守繩墨爲政簡易靜有條理不肯徇世取顯數求  
罷改翰林侍讀學士知審官東院卒神宗知其貧特賜錢  
五十萬贈太中大夫

事見  
國史

贊曰翩翩王孫侃侃儒素國有

大疑庭抗三疏平生美官一寒如故何以贈終知者明主  
京口耆舊傳三諸葛賡傳樞密直學士錢藻誌其墓

周必大跋沈壽岡之祖墓銘後錢藻撰志墓有美而無箴  
久矣然東坡謂錢翰林陳義崢嶸不少自貶則其所以稱  
寺丞者其諸異乎人稱者歟

輿地紀勝一行在所錢惟演任至使相謚文僖公錢易及  
其子彥遠明逸孫勰族孫藻並中賢良方正科 和州范  
增女廟在衙門內舊傳號東城九娘子慶厯初東寇王倫  
攻厯陽見堞南角若有見已而潰散勦除封威顯夫人錢  
藻爲記 錢藻登第又中材識兼茂科

揮塵前錄世掌絲綸本朝則錢希白子飛錢氏又有純老  
穆父焉

郡齋讀書志英宗實錄三十卷熙甯元年三月以錢藻檢

討

直齋書錄解題易解十四卷皇甫泌撰劉彝錢藻皆爲之  
序

孫元忠書閣本戰國策後元祐元年十二月入館卽取曾  
鞏三次所校定及蘇頌錢藻等不足本

咸淳臨安志六十一進士表皇佑四年錢藻嘉祐四年才  
識兼茂明於體用科宣州旌德尉錢藻入第四等 六十

五錢藻字醕老吳越王元瓘子儼入朝爲昭化節度守和  
州十八年儼生昭慈昭慈生順之藻順之子也舉說書進  
士又舉賢良方正皆中其科英宗時爲秘書校理三上書  
請慈聖光獻太后歸政天子神宗時稍遷直舍人院同修

起居注擢知制誥直學士院除樞密直學士知開封府以  
慈恕簡靜爲體不求知名以投世取顯爲屬者有不合而  
遇之無厚薄充遷翰林侍讀學士元豐五年卒藻刻厲爲  
學於書無所不治已通其大旨至於分章別句類數辨名  
叢細委曲無不究盡其見於文辭闕放僂偉故常出眾上  
名動一時爲人清謹寡過居守繩墨立朝無矯亢亦不雷  
同處勢利淡如也人稱其長者

以東都事略曾鞏所撰墓誌修陸文煥臨安縣志同

生潤之潤之生藻

按譜儼生昭懋昭懋

姚宏題戰國策余頃於會稽得孫元忠所校於其族子懋  
殊爲疏略後再叩之復出一本有元忠跋並標出錢劉諸

公手校字



姚寬戰國策後序宣和間得館中孫固孫覺錢藻曾鞏劉敞蘇頌集賢院共七本

續通鑑長編嘉祐四年八月策試賢良方正直言極諫旌德縣尉錢藻藻所對入等授藻試校書郎無爲軍判官藻繆五世孫也

劉莘忠肅集十九次韻錢純老密學白錦帶花七律一

劉敞彭城集十五嘉祐末予始爲學官同舍六人後二年錢醕老爲秘閣校理揚之美出刺潁州劉隱之美至之麻仙夫李景真相次爲王宮教授曩游無復留者

困學紀聞十五仁宗時制科十五人天聖何詠富弼景祐蘇紳吳育張方平田況慶厯錢明逸彥遠皇祐吳奎嘉祐

夏彘陳舜禹錢藻蘇軾轍王介東坡詩先帝親收十五人  
注者多誤

宋史錢明逸傳藻字醜老明逸之從子也幼孤刻厲爲學  
第進士又中賢良方正科爲秘閣校理慈聖后臨朝藻三  
上書乞還政同修起居注知制誥加樞密直學士知開封  
府平居樂易無崖岸而居官獨立守繩墨爲政簡靜有條  
理不肖徇私取顯數求退改翰林侍讀學士知審官東院  
卒年六十一神宗知其貧賻錢五十萬贈大中大夫 藝

文志錢藻賢良方正策五卷

錢昌武 韓魏公安陽集十五有次韻和通判錢昌武郎中

中秋遇雨詩

輿地紀勝三十江州錢昌武謝氏山居記謝景先嘉祐中  
始遊康廬登上霄峰中得墟谷乃董奉升仙之地因卜居  
焉廬山之勝道宮佛宇連比以占得之此地千百年不爲  
人奪豈神物有所惜以俟後人而後授耶  
張耒柯山集二十余向集賢殿試罷寓居京師常游西岡  
錢昌武郎中之第時同會者河東柳子文與錢氏三子夏  
中余出京纔半年而昔日所游者或東或西有不知所如  
者追記春睡詩一首乃寓錢第所爲者  
續通鑑長編元豐元年七月江浙等路提點坑冶鑄錢公  
事錢昌武言潭州瀏陽縣永興銀場自去年銀銅興發乞  
下諸路轉運司應副本司收買銅銀增鑄錢從之仍借支

湖南上供錢十萬緡候所鑄錢撥還及令司農寺於認還

內藏庫歲額錢內支挪十萬緡專置銀赴京

二百九十

錢筠甫

張耒集二十別錢筠甫七絕三首

別錢筠甫三

絕句

錢睦甫

張耒集二十宿錢睦甫南齋

錢仲珣

張耒集十七錢仲珣追船及陳留七律一首

錢申

張耒集四十錢申醫錄序略云近宛丘間居吳人錢

申以醫錄授予得之欣然蓋申善醫而著爲錄其治疾言  
嘗效言其察脈觀色之方而往往著其藥物之劑焉吁其  
用心可見矣

錢舉

晁補之錢舉字少周序吳越武肅王之裔孫錢君名

熹字景貺夢神語之曰易之則利進取迺更名曰舉補之  
曰學以爲己非進取具而求舉以爲養也夫求舉以爲養  
此人之舉非自舉其舉也人之舉士爲知己者用也自舉  
其舉不患莫已知求爲可知也昔左雄薦周舉又薦馮直  
直以臧得罪舉以此劾奏雄雄悅曰宣光奏吾是韓厥之  
舉也人之舉若左雄之知人者可也自舉其舉如周舉之  
報已知者可也則主與客皆免矣而錢君年志方盛慕義  
無窮從補之游五年趣操如一不見補之異也故補之因  
其更名爲改字曰少周少周今惟少於周也老將似之

集三  
十五

錢禹卿 晁補之通直郎權通判環州事錢君墓誌銘錢氏

臨安人自武肅王鏐有吳越至歸本朝其子孫仕宦常數十百人有諱禹卿字仲謨者天下兵馬大元帥尚書令兼中書令秦國忠懿王諱俶之曾孫保靜軍節度觀察留後贈太尉宣惠公諱惟濟之孫而中大夫諱睽之子也以父任爲太廟齋郎調雲安尉徙令繁昌以行法不擾改大理丞擢通判霸州遷通直郎年五十元豐五年三月丁酉卒夫人仁和縣君楊氏悲哀無幾何亦卒二子諒詡女嫁進士石仲堅元祐二年十二月庚寅葬應天府楚邱縣固胡村之原以楊夫人祔其弟山南東道節度推官唐卿來曰吾母君之從祖姑而吾兄君所知也願以數言藏其墓補之曰諾君舉進士博達彊力所居官可道在霸州有告權

金史卷之三  
三  
場火者衆相傳虜至守陴警備君曰何至是遣捕之果小  
偷也在環州屬靈武用兵守辟君提舉糧草虜縱抄輸者  
不繼而君崎嶇獨全霸環西北要害郡朝廷方以此觀君  
而用之而君死矣補之旣悲君不遇而誌之且申其事以  
爲銘曰杭錢姓武肅顯遭亂離匿負販鑑山石袞龍儼奮  
入都五王遠世阻江不絕獻宋龍興致其版愛生人流斯  
善將及相卿士行自忠懿胙秦墟子保靜有旄旗粵其孫  
中大夫世不乏發仲謨令繁昌發跡初佐兩邦政有譽火  
邊市人驚俘饋靈武行者堵克揜補莫告劬秩通直五十  
殂夫人楊殞戚吁子諒詡儒冠裾女一人石氏夫歲丁卯  
月極涂十二日歸其居何以識原固胡

吳榮光歷代名人年譜宋明道二年錢仲謨禹卿生元豐五年卒年五十

錢公輔 歐陽文忠四六集七有回鄭獬錢公輔二舍人謝新除書注嘉祐八年八月

元豐類稿廣德軍重修鼓角樓記略治平四年尙書兵部員外郎知制誥錢公輔守是邦始因豐年聚材積土將改而新之會尙書駕部郎中朱公壽昌來繼其任明年政成封內無事乃擇能吏揆時庀徒自冬十月甲子始事至十二月卒功宜刻金石以書美實使是邦之人百世之下於二公之德尙有考也

王珪華陽集十七兵部員外郎知制誥知江甯府錢公輔



待罪特放詔一

蘇魏公集五十七蔡子難墓誌銘當時臺閣文雅之士亦多與之游接而善聽其論議若毗陵錢君倚臨川裴如晦陳留孫聖塗並稱其才適時用

江鄰幾雜志胡瑗翼之卒凶訃至京錢公輔學士與太學生徒百餘人詣興國戒壇舉哀又自陳師喪給假二日近時無此事 錢君倚學士說江南王公大人墓莫不爲村人所發取其塼以賣之是塼爲累也近日江南有善心家不用塼葬唯以石灰和篩土築實其堅如石此言甚中理 錢君倚云漢書律歷志鈞著一月之象又云輔弼執玉以翼天子科場舉人以爲賦題著疑是者玉疑是之字監

本之悞也 王達知越州修城卒暴民至發墓磚錢公輔作倅視磚文有永和年號亦有孝子姓名者先葬無主枯骨等亦見掘矣

東坡跋錢君倚書遺教經錢公雖不學書然觀其書知其爲挺然忠信禮義人也軾在杭州與其子世雄爲僚因得觀其所書佛遺教經刻石峭峙有不回之勢孔子曰仁者其言也訥今君倚之書蓋訥云

景定建康志四仁宗飛白堯舜佛安字賜知江甯府錢公輔

宋文鑑三十有錢公輔弔王右軍宅辭 六十六錢公輔廣德軍謝上表 八十錢君倚義田記

吳郡志十四載錢公輔范文正公義田記

蘇詩廣陵會三同舍各以其字爲韻第一首劉貢父云況逢賢主人白酒撥春甕竹西已揮手灣口猶屢送施注錢公輔字君倚時正在郡賢主人謂君倚也

東軒筆錄十五錢公輔與王荆公坐忽言荆公曰周武王眞聖人也荆公曰何以言之公輔曰武王年八十猶爲太子非聖人詎能如是荆公曰是時文王尙在安得不爲太子也

王得臣塵史治平間李尉廣德錢公輔君倚守郡一日召李登城亭問及郡事簡得暇山川行樂昔葉道卿云贏得十年間某止得五年亦足矣自謂不越五年復入至五年

錢卒

宋諸臣奏議四十九韓維上英宗論范鎮乞郡有云陛下  
前黜錢公輔中外莫不以爲太重至或相傳謂公輔別有  
過慮上不欲暴揚故行遣至此注治平三年正月上

石林燕語九治平初王景彝自御史中丞除樞密副使錢  
公輔知制誥繳辭頭時英宗初卽位韓魏公當國以爲始  
除大臣而不奉詔恐主威不立乃特責滁州團練副使議  
者以爲太過司馬君實知諫院意亦以爲是而不救及後  
論陝西義勇事章六上不行乃於求罷章中始云錢公輔  
一上章止樞密副使恩命於詔令未行之前而責授散官  
臣六上章阻宰相大義於詔令已行之後而不以爲罪是

典刑不均一矣請比公輔更責遠小處疏入不報蓋意指魏公也

李薦書胡瑗在湖學時福唐劉彝中往從之學者數百人彝爲高第熙甯二年召對上曰其門人今在朝者爲誰對曰若錢藻之淵篤孫覺之純明范純仁之直溫錢公輔之簡諒皆陛下所知也

名臣言行前錄十引

墨客揮犀二錢君倚學士服除知江甯府常州有無賴男子來謁曰我乃先公故侶也先公嘗貸我二十萬幸見還君倚愀然變色起謝之延饌送保甯館留且將聚質償之常有老先生數人聞之俱至責無賴子曰舍人方起復貧甚奈何以其親爲言欺取無券質之財父老俱白君倚請

郤逐之君倚笑曰豈可彼以吾父有所貸未償爲請公輔  
爲之子何敢不償哉於是償之遣去無賴至常州人人聚  
罵遂自縊而死

野客叢書二十七歐公作滁州醉翁亭記自首至尾多用  
也字人謂此體初見歐公前此未聞僕謂前輩爲文必有  
所祖又觀錢公輔作越州井儀堂記亦是此體如其末云  
問其辨之歲月則嘉祐五年二月十七日也問其作之主  
人則太守刁公景純也問其常所往來而其樂者通判沈  
君興宗也誰其文之晉陵錢公輔也其機杼甚與歐記同  
此體蓋出於周易雜卦一篇

沈遼西谿集有七言和君倚景靈行古詩一首

費袞梁谿漫志紫薇錢公公輔登第爲第三

容齋續筆荆公作錢公輔母墓銘但云子貴於朝豐顯矣公輔不滿公曰宜以見還

聞見錄王荆公爲錢公輔銘母夫人蔣氏墓不稱公輔甲科但云子官於朝豐顯矣里巷之士以爲太君榮後云孫七人皆幼不書其名公輔意不滿以書言之公復書曰比蒙以銘文見屬輒爲之而不辭不圖乃猶未副所欲欲有所增換鄙文自有意義不可改也宜以見還而求能如足下意者爲之如得甲科人爲通判何足爲太夫人之榮哉故銘以謂閭巷之士以爲太夫人榮明天下有識者不以置榮辱也至於諸孫亦不足列孰有五子而無七孫者乎

事文類聚  
前集六十

猗覺寮雜記歐公作尹師魯墓誌王介甫作錢公輔墓誌  
皆不免紛紛況他人乎二公作書力辨可以爲庸妄之戒  
周輝清波別志王荆公誌錢公輔母夫人墓錢乞改定公  
答書謂家廟以今法準之恐足下未得立得甲科爲通判  
通判之廨有池臺竹石之勝何足爲太夫人榮是固然矣  
至云諸孫亦不足列孰有五子而無七孫者乎臨川集誌  
公輔母蔣  
夫人末云孫七皆幼豈從其所請或後來增入耶輝  
頃於故家得汴都所刊荆公集無孫七皆幼四字  
東坡年譜熙甯七年五月道過常州作錢公輔哀辭疑公  
輔卒於是年

王安石臨川集明州錢君倚衆樂亭詩



京口耆舊傳顧方傳調明州象山令踰年民大化服而方病邑民相率禱於塔廟者千人弗痊則用東藩之俗爲鬻股肉者十三人方竟不起百里內號泣思慕爲之立祠錢君倚胡完夫皆爲方記其事刻石祠中

東都事略孫抃傳知制誥錢公輔議謹按三代之法郊以祭天明堂以祭五帝郊之祭以始封之祖明堂之祭以創業繼體之君故孝經曰昔者周公郊祀后稷以配天宗祀文王於明堂以配上帝又曰孝莫大於嚴父嚴父莫大於配天則周公其人也以周公言之則嚴父以成王言之則嚴祖矣方是之時政則周公祭則成王亦安在乎必嚴其父哉我將之詩是也臣竊謂聖宋崛起非有始封之祖也

則創業之君遂爲太祖矣太祖則周之后稷配祭於郊者也太宗則周之文王配祭於明堂者也真宗則周之武王宗乎廟而不祧者也當仁宗嗣位之初儻有建是論者則配帝之祭當在乎太宗矣當時無一言者故使宗周之典禮不明於聖代願深詔有司博謀羣臣而議焉臣稱曰至議配祭也公輔之論得禮之正

十一百七十一

輿地紀勝慶元府錢公輔仁宗朝知州有善政自明台入爲修注 錢公輔序衆樂亭居南湖之中南湖又居城之中望之眞方丈瀛洲焉 衆樂堂在西湖中錢公輔所建荆公有明州錢君倚衆樂堂詩又寄題衆樂堂詩温公寄題錢公輔君倚明州重修衆樂堂詩 廣德軍竺深字道

源力學隱居郡守錢公輔築堂名清容訓誘郡人號清容先生

郡齋讀書志錢賢良進卷十卷右皇朝錢公輔字君倚武進人從胡瑗學昭陵未知制誥

直齋書錄解題張籍集三卷木鐸集十二卷張洎所編錢公輔名木鐸集與他本相出入亦有他本所無者

文獻通考郊社考淳熙六年秋九月大享明堂合祭天地復奉太祖太宗先時詔今歲行明堂大禮令禮部太常寺詳議宰執進呈禮寺議狀若據已行典禮及用仁宗時名儒李觀明堂嚴祖說并治平中呂誨司馬光錢公輔等集議近歲李燾奏劄所陳特舉秋享於義爲允 刑考詳讞

門熙甯元年詔謀殺已傷案問欲舉自首從謀殺減二等論詔翰林學士司馬光王安石同議安石以爲合從謀殺減二等論詔送翰林學士呂公著韓維錢公輔於是公著等言云云宜如安石所議便制曰可

宋史傳錢公輔字君倚常州武進人少從胡翼之學有名吳中第進士甲科通判越州爲集賢校理同判吏部南曹歷開封府推官戶部判官知明州衙前法以三等差次勞勤應格者聽指酒場以自補富者足欲而貧者日困充募益鮮額有不足至役鄉民破產不供費公輔取酒場官鬻之分輕重以給役者不復調民同修起居注進知制誥英宗卽位陳治平十議大要言采民政分吏課擇守宰置二

府官屬又作帝問一篇上之王疇爲翰林學士未久擢副  
樞密公輔謂疇素望淺不草制帝以初政用大臣而公輔  
格詔謫爲滁州團練使議者以爲重呂誨等上章救之不  
得踰年起知廣德軍神宗立拜天章閣待制知鄧州復知  
制誥入見帝勞苦之使錄十議以進命知諫院嘗至中書  
白事富弼謂曰上求治如飢渴正賴君輩同心以濟公輔  
曰朝廷所爲是天下誰敢不同所爲非公輔欲同之不可  
得已王安石雅與之善旣得志排異己者出滕甫鄆州公  
輔數於帝前言甫不當去薛向更鹽法安石主其議而公  
輔謂向當黜遂拂安石意罷諫職旋出知江甯府明年帝  
欲召還安石言其助小人爲異議不宜在左右但徙揚州

以病乞越改提舉崇福觀卒年五十二 神宗紀熙甯二  
年五月癸未知制誥錢公輔罷知江甯府

湧幢小品吳江長橋乃慶厯二年尉王庭堅所造錢公輔  
有記

金石文跋尾衆樂亭詩石刻在甯波府賀祕監祠下詩爲  
錢君倚首唱而王安石司馬光鄭獬邵必吳中復吳充馮  
浩和之最下有益柔二字可辨當是王益柔也君倚作詩  
在知明州曰其後被召爲同知起居注乃邀諸公同作故  
鄭毅夫詩有使君今作螭頭臣之句介甫嘗知鄞縣然不  
與君倚同時此亦同在起居注局所作也

錢唐卿 晁補之清平縣新修孔子廟記羣有司所治異事

而事之在縣者十九以其十一用心乎治之本則力不給  
故雖有庠序教化亦十九不舉一有舉焉令之才足以任  
事可知已魏爲天子北都而清平爲畿縣並河水數至自  
慶厯逮治平縣再徙不復立孔子祠爲屋居神民往來猶  
原上也令始至吏導之拜屋下歲春秋釋奠爲次草間吏  
曰卽次乃卽次日曰行事乃行事曰禮畢乃禮畢俛默而出  
不復省或告曰此宜省則嘖蹙曰吾有公事不暇也若是  
者有年至風雨屋壞不支縣之民爲士者滋少令錢侯之  
來惻然悲出涕裴回彷徨顧相其地得舊材瓦甍在官者  
幾具始復興之人歡然從不勸而成有堂有筵兩廡四墉  
饕爨有所若祭器咸在而人不病斯已才矣夫儒術之於

成民欲久於其道則爲功緩故急於人知者忽之錢侯不以人之所急者爲先而急於人之所緩則其賢又可知已由是詢諸邑人其大者旣舉其細者有不治余不信也錢侯名唐卿字元輔余王姑之子云元豐六年二月乙丑北

京國子監教授晁補之記

雞肋集二十九

錢師孟 避暑錄話下嘉祐中邕州佛寺塑像其手忽振動晝夜不止未幾交趾入寇城幾陷其後又動而儂智高反圍城卒陷之屠其城去熙寧元年又動郡守錢師孟知其不祥亟取投之江中

東坡送錢承制赴廣西路分都監當年我作表忠觀坐覺江山氣未衰舞鳳尙從天目下收駒時有渥洼姿踞牀到



處堪吹笛橫梁何人解賦詩知是丹霞燒佛手先聲應已  
懾羣夷自注廣西僧寺頃有佛動之異錢君碎而投之江  
中

文獻通攷三百七物異攷元豐元年邕州佛像動搖初像  
嘗動而交人入寇又動而州大火其後儂智高叛復動於  
是知州錢師孟投之江中

宋史五行志同  
交人作夏人

宋史蠻夷傳三熙甯初知宜州錢師孟通判曹覲擅裁損  
侵剝之士人羅思念蒙承想蒙光仲等爲亂

謝啓昆粵西金石略融縣真德巖詩元豐六年七月一日  
由殿承制權知融州軍州事錢師孟立石

錢弋

指月錄二十六隆興府寶峰克文雲庵真淨禪師條

下有錢弋郎中訪師云云

謝旻江西通志秩官門知筠州錢弋比部郎中熙甯間任  
錢昉 謝旻江西通志秩官門知袁州錢昉由司農少卿熙  
甯二年任

錢羔羊 續通鑑長編熙甯三年國子博士致仕錢羔羊追  
三任及衢州編管

咸淳臨安志八十九祖無擇知杭州坐聽造景羔羊應巖  
等曲法請求法寺奏已會去年十一月德音內無擇羔羊  
應巖皆特斷餘如法寺所奏

按長編爲任造  
王景張應巖

錢褒 萬姓統譜二十七錢褒晉江人性純孝母喪負土成  
墳結廬居山葷腥不入口形容毀瘠終制方還熙甯中郡

守順州人之請兩聞於朝乞召試擢用以勵風俗嘗著志孝六篇州繳以進

錢長卿 宋秘書本周髀算經前元豐七年九月校定諸臣

銜名有朝奉郎行秘書省校書郎臣錢長卿

見天祿林  
邨後編

張巨建算經緝古算經後均有元豐七年九月校定官朝奉郎行秘書省校書郎錢長卿

咸淳臨安志四承旨檢詳編修在樞密院檢詳楊萬里記  
記曰樞密之屬曰都承旨副都承旨曰檢詳曰編修在祖宗時編修則顧臨錢長卿皆其選已

麟臺故事熙甯三年十月詔秘書省著作佐郎錢長卿編經武要略兼刪定諸房例冊

錢溫舒 嘉定赤城志十一縣令表甯海縣令元豐七年錢  
溫舒元祐元年替

錢兢 吳郡志二十八進士題名元豐八年錢兢

衡水知縣 莊裕雞肋編上元豐中有以士人姓名爲對者  
有馬子山騎山子馬之句偶有姓錢人任衡水知縣人遂  
以錢衡水盜水衡錢其人聞之大怒欲辨其事對者謝曰  
君雖實無且欲與山子馬爲偶耳

錢叔獻 輿地紀勝濠州元豐中郡人錢叔獻見一石刻云濠  
州碑及開元寺碑皆江南韓熙載書

錢公纘 蘇魏公集三十四外制有前虢州虢略縣令錢公  
纘可大理寺丞制詞西京左藏庫副使錢昌符可左驍衛

將軍致仕制詞

錢昌符 見上

錢豐 劉放彭城集二十九榮弋妻范墓誌女長嫁某州錄

事叅軍錢豐

嘉定赤城志三十三進士科紹興八年黃公度榜有錢豐

天台人字彥和終温州教授

按未知即錄事參軍否姑附此男國鏐謹記

錢曜 劉放彭城集十九水部郎中王諤可知濟州都水監

錢曜可水部郎中制臺郎重選郡守優寄朝廷待材用之

宅兼仕宦之美是皆雍容內外之望用為更互出入之地

以諤劾文昌既歷歲月俾分符竹往臨鉅野以曜領護都

水丞事修舉進升省闈仍蒞起曹勉副懋恩力圖來效

錢顛 東坡集有至秀州贈錢公安道并寄其弟惠山老詩  
慚愧冒寒髯御史王注安道以髯爲御史故云 又和錢  
安道寄惠建茶詩錢安道席上令歌者道服詩

趙抃清獻集答贛縣錢顛著作移花七絕

三衢志云錢顛常之無錫人也熙甯初爲御史論參政王  
安石貶衢州酒稅時御史孔昌齡專附王安石顛大罵之  
遂拂衣上馬去司馬光言顛責太重不報在衢數年後家

於秀終焉

輿地紀勝常州

輿地紀勝秀州錢顛常之無錫人熙甯初爲御史裏行論  
王安石責衢州後徙家於秀家貧母老丐親舊以自給藏  
書數千卷竟終於秀事見三衢志

東都事略劉琦字公玉宣州宣城人也錢顛字安道常州無錫人也俱以進士第熙甯初琦自通判歙州召爲侍御史顛自知烏程縣召爲侍御史裏行王安石初得政專肆胥臆輕易憲度侵奪三司利柄而曾公亮依違固寵畏避不言琦顛與劉述上疏以爲安石白應舉歷官以來莫不知尊尙堯舜之道以倡率學者故天下士人心無不歸向謂之爲賢陛下亦聞而知之遂致位公府今遭時得君如此之專當以平時所學仁義之道啓沃上心以廣聖德今乃首以財利之議務爲容悅言行乖戾一至於此剛狠自任則又甚焉不知安石之心待陛下爲如何主也陛下天姿英悟不世而出堯舜至治指日可復今反以霸國諸侯

之術唐室衰世之事誘惑上聽何不恭之甚也臣等願陛下奮乾剛之斷罷安石重任以慰安天下元元之心曾公亮位居丞弼被遇三朝自當悉慮竭忠以身許國反有畏避安石之意陰自結援更相稱譽以固寵榮致安石奏對之際唯肆強辨多生橫議豈執政大臣之體乎況公亮久妨賢路無補時政亦宜罷免安石怒貶琦爲監處州鹽稅顛監衢州鹽稅顛將出臺於眾坐罵同時御史孫昌齡曰平日士大夫未嘗知君名特以王安石昔居憂金陵君爲幕官奴事安石以故得爲御史今日亦當少念報國奈何專欲務安石求美官顛今得罪分當遠竄君在後爲美官自謂得策卽我視君犬彘之不如也遂拂衣上馬貶官後



數年琦起爲通判鄧州顛徙秀州而卒時琦年六十一顛  
五十三 呂誨傳自誨罷去後御史劉述劉琦錢顛繼以  
言安石被黜 劉述傳旣而述與同時御史劉琦錢顛極  
論安石 王安石傳御史劉琦錢顛劉述又交論安石專  
肆胥臆輕易憲度殿中侍御史孫昌齡亦繼言皆坐貶  
陳薦傳范純仁胡宗愈劉琦錢顛相繼罷言職薦言御史  
天子耳目之官今以言而逐之是自蔽其耳目也 范純  
仁傳劉琦錢顛以論安石同時罷御史純仁言琦等一言  
柄臣遽以罪去今在廷阿附者已爾奈何更以法驅之  
文獻通考刑考劉述等又奏以爲不當以敕頒御史臺大  
理寺審刑院及開封府而不循之諸路人誤引刑一司中

丞呂誨御史劉琦錢顛皆請如述等奏下之二府

宋史傳錢顛字安道常州無錫人初爲甯海軍節度推官守孫沔用威嚴爲治屬吏奔走聽命顛當官而行無所容撓遇不可必爭之由是獨見器重知贛烏程二縣皆以治行聞治平末以金部員外郎爲殿中侍御史裏行許遵議謀殺案問刑名未定而入判大理顛以爲一人偏詞不可以汨天下之法遵所見迂執不可以當刑法之任不從二年而貶將出臺於衆中責同列孫昌齡曰平日士大夫未嘗知君名徒以昔官金陵媚事王安石宛轉薦君得爲御史亦當少思報國奈何專欲附會以求美官顛今當遠竄君自謂得策邪我視君犬彘之不如也卽拂衣上馬去後

自衛徙秀州家貧母老至乞貸親舊以給朝晡而怡然無  
謫官之色蘇軾遺以詩有烏府先生鐵作肝之句世因目  
爲鐵肝御史卒年五十三 神宗紀熙寧二年八月癸卯

御史裏行錢顛貶監衢州鹽稅以論安石故

刑法志三

御史錢顛請罷遵

許

大理詔送翰林學士呂公著韓維知

制誥錢公輔重定公著等議如安石制曰可判刑部劉述  
等又請中書樞密院合議中丞呂誨御史錢顛皆請如述  
奏下之二府 許遵傳詔司馬光王安石議光以爲不可

安石主遵御史中丞滕甫待御史錢顛皆言遵所爭良法

自是廷論紛然

劉述傳述率御史劉琦錢顛其上疏曰

安石執政以來未踰數月中外人情囂然胥動蓋以專肆

胸臆輕易憲度無忌憚之心故也陛下任賢求治常若飢渴故置安石政府必欲致時如唐虞而反操管商權詐之術規以取媚遂與陳升之合謀侵三司利柄取爲己功開局設官用八人者分行天下驚駭物聽動搖人心去年因許遵文過飾非妄議自首按問之法安石任一偏之見改立新議以害天下大公章辟光獻歧邱遷外之說疏間骨肉罪不容誅呂誨等連章論奏乞加竄逐陛下雖許其請安石獨進瞽言熒惑聖聽陛下以爲愛己隱忍不行先朝所立制度自宜世世子孫守而勿失乃欲事事更張廢而不用安石自應舉厯官尊尙堯舜之道以倡率學者故士人之心靡不歸向謂之爲賢陛下亦聞而知之遂正位公

府遭時得君如此之專乃首建財利之議務爲容悅言行  
乖戾一至於此剛狠自任則又甚焉姦詐專權之人豈宜  
處之廟堂以亂國紀願早罷逐以慰安天下元元之心曾  
公亮位居丞弼不能竭忠許國反有畏避之意陰自結援  
以固寵久妨賢路亦宜斥免趙抃則括囊拱手但務依違  
大臣事君豈當如是疏上安石奏先貶琦顛監處衢州鹽  
務公亮疑太重安石曰蔣之奇亦降監當從之司馬光上  
疏曰今琦顛所坐不過疏直乃以迂犯大臣猥加譴謫恐  
臣下自此以言爲諱乞還其本資以靖羣聽不報 范純  
仁傳純仁言安石以富國強兵之術啓迪上心欲求近功  
忘其舊學異己者爲不肖合意者爲賢人劉琦錢顛等一

言便蒙降黜 食貨志均輸熙甯二年八月侍御史劉琦

侍御史裏行錢顛等言向薛小人假以貨泉任其變易縱

有所入不免奪商賈之利琦顛皆坐貶

強至祠部集八有題錢安道節推環秀亭詩

東軒筆錄九荆公方得君銳意新美天下之政自宰執同

列無一人議論稍合而臺諫等疏攻擊者無虛日呂誨范

純仁錢顛錢顛之倫尤極詆訾

兩浙金石志西安縣唐石橋詩刻有熙甯辛亥錢顛題名

湖州志錢顛字安道無錫人熙甯六年烏程令

錢道人 蘇詩惠山謁錢道人烹小龍團登絕頂望太湖七

律又錢道人有詩云直須認取主人翁作兩絕戲之又贈

錢道人五古一首

道人疑安道之弟

錢乙

劉跛錢乙傳錢乙字仲陽上世錢塘人與吳越王有

屬王俶納土曾祖贊隨以北因家於鄆父顥善鍼醫然嗜酒喜游一日匿姓名東游海上不復返乙時三歲母前亡父同產嫁醫呂氏哀其孤收養爲子稍長讀書從呂君問醫姑將沒乃告以家世乙號泣請往迹父凡五六往乃得所在又積數歲乃迎以歸是時乙年三十餘鄉人感慨爲泣下多賦詩詠其事後七年父以壽終喪葬如禮其事呂君如事其父呂君沒無嗣爲之收葬行服嫁其孤女歲時祭享皆與親等乙始以廩頤方著名山東元豐中長公主女有疾召使視之有功奏授翰林醫學賜緋明年皇子儀

國公病瘵癡國醫未能治長公主朝因言錢乙起草野有  
異能立召入進黃土湯而愈神宗皇帝召見褒諭因問黃  
土所以愈疾狀乙對曰以土勝水水得其平則風自平且  
諸醫所治垂愈小臣適逢之惟陛下加察天子悅其對擢  
太醫丞賜紫衣金魚自是戚里貴室逮士庶之家願致之  
無虛日其論醫諸老宿莫能持難俄以病免哲宗皇帝復  
召入宿直禁中久之復辭疾賜告遂不復起乙本有羸疾  
性簡易嗜酒疾屢發自以意治之輒愈最後得疾憊甚乃  
歎曰此所謂周痺也周痺入臟者死吾其已夫已而曰吾  
能移之使病在末因自製藥日夜飲之人莫見其方居無  
何左手足攣不能用乃喜曰可矣又使所親登東山視菟



絲所生篝火燭其下火滅處刷之果得茯苓其大踰斗因以法噉之閱月而盡由此雖偏廢而氣骨堅悍如無疾者退居里舍村門不冠屨坐臥一榻上時間閱史書雜說客至酌酒劇談意欲有適則使二僕夫輿之出入間巷人或邀致不肯往也病者日造門或扶攜襁負纍纍滿前近自鄰井遠或百數十里皆授之藥致謝而去初長公主女病泄痢方始乙方醉曰當發疹而愈駙馬都尉以爲不然怒責之不對而退明日疹果出都尉喜以詩謝之廣親宗子病診之曰此可無藥而愈願其幼曰此且暴病驚人後三日過午無恙其家恚曰幼何疾醫貪利動人如此明果發癘甚急復召乙治之居三日愈問何以無疾而知曰火色

直視心與肝俱受邪過午者心與肝所用時當更也宗室  
王子病嘔泄醫以藥溫之加喘乙曰病本中熱奈何以剛  
劑燥之將不得前後洩與石膏湯王與醫皆不信謝罷乙  
曰毋庸復召我後二日果來召適有故不時往王疑且怒  
使人十數輩趣之至曰固石膏湯症也竟如言而效有士  
人病欬面青而光其氣哽哽乙曰肝乘肺此逆候也若秋  
得之可治今春不可治其家祈哀強之予藥明日曰吾藥  
再瀉肝而不少卻三補肺而益虛又加唇白法當三日死  
然安穀者過期不安穀者不及期今尙能粥居五日而絕  
有娠婦得病醫言胎且墮乙曰娠者五臟傳養率六旬乃  
更誠能候其月偏補之何必墮已而子母俱得全又乳婦

因大恐而病病雖愈目張不得瞑人不能曉以問乙乙曰  
煮郁李酒飲之使醉則愈所以然者目係內連肝膽恐則  
氣結膽衡不下惟郁李去結隨酒入膽結去膽下目則能  
瞑矣如言而效一日過所善翁聞兒啼愕曰何等兒聲翁  
曰吾家孿生二男子乙曰謹視之過百日乃可保翁不憚  
居月餘皆斃乙爲方博達不名一家所治種種皆通非但  
小兒醫也於書無不窺他人靳靳守古乙獨度越縱舍卒  
與法合尤邃本草多識物理辨正闕誤人得異藥若持疑  
事問之必爲言所生本末物色名號退攷之皆中末年孿  
痺浸劇其嗜酒喜寒食皆不自禁自診知不可爲召親戚  
訣別易衣待盡享年八十二終於家所著書有傷寒論指

微五卷嬰孺論百篇一子早逝二孫今見爲醫河間劉跂  
曰乙非獨其醫可稱也其篤行似儒其奇節似俠術行而  
身隱約又類夫有道者數爲余言曩學六氣五運夜宿東  
平王家嶺觀氣象至月餘不寐今老且死事誠有不在書  
者肯以三十日暇從我當相授余笑謝弗能其後遂不復  
言嗚呼斯人也欲復得之何由哉沒後余聞其所治驗尤  
衆東州人人能言掇其章章者著之篇異時史家敘方術  
之士其將有攷焉

學易集七宋  
史方術傳同

劉跂暇日記錢乙言渠病周髀髀周者本草磁石主周髀  
注凡髀隨血脈上下不能左右去爲周髀乙以藥使痺氣  
歸支體以寬心腹之苦故手足攣而心腑無恙 錢乙言

熊膽奇藥家有小兒不可無此佳者色通明如米粒用草  
莖點入水轉如飛惟性急者良膽入水亦能轉但緩耳勇  
士所聚爲膽故也

說郭二  
十七

胡尙書奏議序昔錢乙病周痺曰入藏者死乙移之於末  
故雖偏廢而氣骨悍堅壽入十餘

水記  
集

閻季忠小兒藥證真訣序醫之爲藝誠難矣而治小兒爲  
尤難自六歲以下黃帝不載其說始有顛顛經以占壽夭  
死生之候則小兒之病雖黃帝猶難之其難一也脈法雖  
曰八至爲和平十至爲有病然小兒脈微難見醫爲持脈  
又多驚啼而不得其審其難二也脈旣難憑必資外證而  
其骨氣未成形聲未正悲啼喜笑變態不常其難三也問

而知之醫之工也而小兒多未能言言亦未足取信其難  
四也臟腑柔弱易虛易實易寒易熱又所用多犀珠龍麝  
醫苟難辨何以已疾其難五也種種隱奧其難固多余嘗  
致思於此又目見庸醫妄施方藥而救之者十常四五良  
可哀也蓋小兒治法散在諸書又多出於近世臆說汗漫  
難據求其要妙豈易得哉太醫丞錢乙字仲陽汶上人其  
治小兒該括古今又多自得著名於時其法簡易精審如  
指諸掌先子治平中登第調須城尉識之余五六歲時病  
驚疳癖痕屢至危殆皆仲陽拯之良愈是時仲陽年尙少  
不肯輕傳其書余家所傳者纔十餘方 大觀初余筮仕  
汝海而仲陽老矣於親舊間始得說 數十條後六年又

得雜方蓋晚年所得益妙比於京師復見別本然旋著旋傳皆雜亂初無紀律互有得失得參校焉其先後則次之重複則削之訛謬則正之語則易之上卷脈證治法中卷記嘗所治病下卷諸而書以全於是古今治小兒之法不可以加矣余念博愛者仁者之用心幼幼者聖人之遺訓此惠可不廣耶將傳之好事者使幼者免橫天之苦老者無哭子之悲此余之志也因以明仲陽之術於無窮宣教郎大梁閻季忠序

郡齋讀書志錢氏小兒方八卷右皇朝錢乙仲陽撰神宗時擢太醫丞於書無所不窺它人斲斲守古獨度越縱舍卒與法合尤選本草多識物理辨正闕誤最工療嬰孺病

年八十二而終閻季忠方附於後

直齋書錄解題錢氏小兒藥證真訣三卷太醫丞東平錢乙仲陽撰宣教郎大梁閻季忠集上卷言證中卷敘嘗所治病下卷爲方季忠亦頗附以己說且以劉斯立所作仲陽傳附於末宣和元年也小兒斑疹論一卷東平董汲及之撰錢乙元祐癸酉題其末

宋史方技傳錢乙字仲陽本吳越王俶支屬祖從北遷遂爲鄆州人父穎善醫然嗜酒喜游一旦東之海上不返乙方三歲母前死姑嫁呂氏哀而收養之長誨之醫乃告以家世卽泣請往迹尋凡八九反積數歲遂迎父以歸時已三十年矣鄉人感慨賦詩詠之其事呂如事父呂沒無嗣



爲收葬行服乞始以顛顛方著名至京師視長公主女疾  
授翰林醫學皇子病瘵瘵乙進黃土湯而愈神宗召問黃  
土所以愈疾狀對曰以土勝水水得其平則風自止帝悅  
擢太醫丞賜金紫由是公卿宗戚家延致無虛日廣親宗  
子病診之曰此可毋藥而愈其幼在傍指之曰是且暴疾  
驚人後三日過午可無恙其家恚不答明日幼果發癘甚  
急召乙治之三日愈問其故曰火色直視心與肝俱受邪  
過午者所用時當更也王子病嘔泄它醫與剛劑加喘焉  
乙曰是本中熱脾且傷奈何復燥之將不得前後洩與之  
石膏湯王不信謝去信宿寢劇竟如言而效土病欬面青  
而元氣哽咽乙曰肝乘肺此逆候也若秋得之可治今春

不可治其人祈哀強予藥明日曰吾藥再瀉肝而不少卻  
三補肺而益虛又加唇白法當三日死今尙能粥當過期  
居五日而絕孕婦病醫言胎且墮乙曰娠者五藏傳養率  
六旬乃更誠能候其月偏補之何必墮已而母子皆得全  
又乳婦因悸而病既瘉目張不得瞑乙曰煮郁李酒飲之  
使醉卽愈所以然者日系內連肝膽恐則氣結膽衡不下  
郁李能去結隨酒入膽結去膽下則目能瞑矣飲之果驗  
乙本有羸疾每自以意治之而後甚歎曰此所謂周痺也  
入藏者死吾其已夫旣而曰吾能移之使在末因自製藥  
日夜飲之左手足忽攣不能用喜曰可矣所親登東山得  
茯苓大踰斗以法噉之盡由是雖偏廢而風骨悍堅如全

人以病免歸不復出乙爲方不名一師於書無不闕不靳  
靳守古法時度越縱舍卒與法會尤邃本草諸書辨正闕  
誤或得異藥問之必爲言生出本末物色名貌差別之詳  
退而考之皆合末年孿痺寢劇知不可爲召親戚訣別易  
衣待盡遂卒年八十二 藝文志錢乙小兒藥證直訣八  
卷

嘉靖間建三皇廟於太醫院北名景惠殿中奉三皇及四  
配其從祀西廡則錢乙

明陳第世善堂書目宋錢乙小兒秘方八卷小兒藥證直  
訣三卷

武英殿叢書提要小兒藥證真訣二卷宋大梁閻季忠所

編錢乙方論也乙字仲陽東平人官至太醫院丞事跡具  
宋史方技傳乙在宣和間以巫方氏顛顛經治小兒甚著  
於時故季忠集其舊法以爲此書上卷論證中卷爲醫案  
下卷爲方陳振孫書錄解題馬端臨文獻通考並著錄明  
以來舊本久佚惟雜見諸家醫書中今從永樂大典內撈  
拾排纂得論證四十七條醫案二十三條方一百一十有  
四各以類編仍爲三卷又得閻季忠序一篇劉跂所作錢  
仲陽傳一篇並冠簡端條理秩然幾還其舊疑當時全部  
收入故無大佚脫也小兒經方於古罕見自乙始別爲專  
門而其書亦爲幼科之鼻祖後人得其緒論往往有回生  
之功如六味丸方本後漢張機金匱要略所載崔氏八味

丸方乙以為小兒純陽無煩益火除去肉桂附子二味以  
為幼科補劑明薛已承用其方遂為直補真陰之聖藥其  
斟酌通變動契精微亦可以概見矣閻季忠永樂大典作  
閻孝忠然書錄解題及通考皆作季忠疑永樂大典為傳  
寫之訛今改從諸家作季劉跂字斯立東平人摯之子也  
有學易集別著錄所撰乙傳與宋史方技傳略同蓋宋史

即據此傳為藍本云

按今本四庫全書總目脫此條

日本澀江全善森立之經籍訪古志補遺錢氏小兒藥證

直訣三卷

清陳世傑仿宋本

首冠己亥冬月陳汝楫序及目錄卷

端頁面記照宋本重刊起秀堂梓目錄後有宣和元年閻  
孝忠序卷首題閻孝忠集每半版八行行十六字書法端

雅字如錢大開卷悅目其取原於宋本無疑未附闡氏附  
方及仲陽傳一篇又附刊董氏斑疹方論一卷攷闡序是  
書分爲上中下三卷復取所著經驗方附後此本卷第正  
與其所言符世多傳熊氏類證薛氏校註俱頗有增修此  
本特不失舊觀真爲可貴然幼幼新書醫方類聚所引諸  
條或有此本闕而熊本載之者他可以彼訂此者極多則  
此本未得稱精善也又近得一小字別本乃依是本更增  
入諸方甚爲僿俗但陳氏是刻缺闡序初頁亦或有全漏  
落者有小字本始得補完此可嘉也 類證註釋錢氏小  
兒方訣十卷 明初小字刊本崇蘭館藏 首有正統五年熊宗立序及目  
錄每卷首題門人間孝忠編集鼇峰熊宗立類證每半板

十一行行二十一字不記刊行歲月按此本脈證治方皆以類編次頗改換舊第然小兒脈法條不治等數字此本小書與新書類聚合宋本大書轉失舊裁黃承務子病瀉條後宋本剩有睦親宮中十大王一條此本不載新書亦不引實係重複瀉黃散論石膏條羌活膏論雞舌香條蟬蛻散論羊角條宋本皆漏落諸如此類是本尤見長他文字異同與新書類聚所引合其可據以訂宋本之誤者亦多意者熊所原蓋爲宋時善本攷是書宋本分三卷此爲閻氏舊裁此本十卷似後來分析者然宋志藝文略並云八卷讀書後志亦云錢氏小兒方八卷閻孝忠方附於後書錄解題作三卷蓋指陳氏所原宋本此本第一至第八錢氏所撰其他兩卷屬閻氏附方則亦與宋

志諸書所言合蓋宋時所傳不止一本故二本取原各異

則始不可得偏廢也小方脈科徒知宋本可貴而不知此

本亦為佳種茲表出之是書又有明初大字刊本崇蘭館藏未見

正德戊辰存德書堂重刊本原本未見酌源堂藏世傳舊

抄概依是諸本而更有薛氏校注本數通一嘉靖辛亥原刊一十六種本

一二十四種本一寬永三年活字板痘疹大全本俱改竄頗多又有武英殿

刊本未見董氏小兒斑疹備急方論一卷陳世傑本小兒直訣附刊

宋東平董汲及之論次首有東平十柳居士孫準平甫序

及自序末有元祐癸酉錢乙後序

錢如璧 通考五行類三辰通載三十四卷陳氏曰嘉禾錢

如璧編集五星命術二百五十五



陳第世善堂書目錢如璧五行精紀三十四卷

南宋樓藏書志三辰通載三十卷影寫宋刻本宋錢如璧撰陸

心源曰書錄解題文獻通考讀書敏求記著錄皆三十四

卷此本三十卷

錢承志 宋史藝文志錢承志說文正隸三十卷九經簡要

十卷經史事類三十卷子史語類十卷

錢景衍 同上錢景衍南嶽勝概一卷又見子部道釋類下多編字

錢諷 同上錢諷史韻四十卷

通考史韻四十九卷陳氏曰嘉禾錢諷正初撰附韻類事

頗便檢閱

曝書亭集四十三回溪史韻跋回溪錢諷字正初吾鄉人

也所撰史韻四十九卷予嘗見宋時錄本於京師僅存七冊嫌其殘闕未之錄也歸田之後始大悔之從琴川毛氏長洲何氏訪其所藏合之才十七卷亟寫而存之笥宋人兔園冊類雙字編四聲以便簡閱回溪獨采成語有多至三四句者未嘗割裂原文信著書之良法矣天下之寶離者會有合時安知後來所求不適少此十七卷耶

錢汝 通志醫方類小兒論三卷錢汝撰

錢昌宗 通志類書類慶歷萬題六十卷錢昌宗編

錢師益 通志藝術類益津射格一卷晁氏曰宋朝錢師益序以五善圖及武陵格疏密不同參酌爲之

